



Ni Pangulong Thomas S. Monson

Gugma—ang Kahulugan sang Ebanghelyo

Indi naton mahigugma sang matuod ang Dios kon wala naton ginapalangga ang aton isigkatawo sa sining kabuhi.

Pinalangga kong mga kauturan, sang nag-alagad ang aton Manluluwas sa mga tawo, ginpamangkot Sia sang nalibgan nga abogado, “Manunudlo, ano bala ang dakong sugo sa kasuguan?”

Si Mateo nagrekord nga si Jesus nagsabat:

“Higugmaa ang Ginuo nga imo Dios sa bug-os mong tagipusuon, kag sa bug-os mong kalag, kag sa bug-os mong hunahuna.

“Ini amo ang dako kag naunaung sugo.

“Kag ang ikaduha kaangay sini, Higugmaa ang imo isigkatawo subong sa imo kaugalingon.”¹

Ginkompleto ni Marcus ang kasaysayan upod ang pahayag sang Manluluwas: “Wala na sing iban nga sugo nga dako pa sa ila sini.”²

Indi naton mahigugma sang matuod ang Dios kon wala naton ginapalangga ang aton isigkatawo sa sining

kabuhi. Kag sa amo man, indi naton lubos nga mahigugma ang aton isigkatawo kon wala naton ginahigugma ang Dios, ang Amay naton tanan. Si Apostoles Juan nagaugid sa aton, “Kag ining sugo nabaton ta sa iya, nga ang nagahigugma sa Dios maghigugma sa iya utod man.”³ Kita tanan espiritu nga mga anak sang aton Amay nga Langitnon, kag, tungod sini, mga mag-ulolutod. Kon aton panumduanon ining kamatuoran, ang maghigugma sang tanan nga mga anak sang Dios mangin mas mahapos.

Sa matuod lang, ang gugma amo ang pinakakahulugan sang ebanghelyo, kag si Jesucristo amo ang aton Halimbawa. Ang iya kabuhi isa ka panublion sang gugma. Ang mga masakiton Iya nga gin-ayo; ang mga ginapigos Iya nga ginbuligan; ang mga makasasala Iya nga ginluwas. Sang ulihi ang akit ng mga guban nagkuha sang Iya kabuhi. Wala'y

sapayan nabatian gikan sa bukid sang Bagol [Golgota] ang mga tinaga: “Amay, patawara sila; kay wala sila makahibalo sang ila ginahimo”⁴—ang pinakamataas nga halimbawa sang kaluoy kag gugma.

May madamo nga mga kinaiya nga nagapakita sang gugma, pareho sang kaluoy, pagkapasensyoso, kaalwan, paghangop, kag pagpatawad. Sa tanan naton nga mga kaangtanan, ang mga ini kag ang iban pa nga mga kinaiya makabulig nga mangin athagon ang gugma nga yara sa aton mga tagipusuon.

Sa masami ang aton gugma mapakita sa aton pagsinalayo sa adlaw-adlaw kaupod ang kada isa. Pinakaimportante amo ang aton ikasarang nga matalupangdan ang panginahanglan sang isa ka tawo kag dayon aksyunan ini. Ginapakamahal ko gid ang mga tinaga nga ginpahayag sa isa ka malip-ot nga binalaybay:

*Nagahibi ako sa kagab-ihon
Tungod sa kakitid sang akon
panulukan
May nagakinahanglan nga wala
ko matalupangdan;
Pero wala ko pa gid mabatyagan
Ang bisan diutay nga pagkanugon
Tungod sa medyo sobra nga
pagkamaluluy-on.⁵*

Sang san-o lang may nakasugid sa akon parte sa isa ka makatalandog nga halimbawa sang mapinalang-gaon nga kaayo—isa nga may wala ginapaabot nga resulta. Sang tuig 1933, tungod sang Great Depression (tion sang sobra nga kapigaduhon), maiwat ang oportunidad nga

makakita sang trabaho. Ang lugar yara sa nasidlangan nga bahin sang Estados Unidos. Si Arlene Biesecker bag-o lang gid makagradweyt sa high school. Pagkatapos sang malawig nga pagpangita sang trabaho, nakasulod gid man sia sa isa ka pabrika sang mga bayo bilang sastre. Ang mga na-gaobra sa pabrika ginabayran lamang sa tagsa ka panid sang bayo nga matahi nila sing husto kada adlaw. Kon mas madamo ang ila matapos, mas dako ang ila kitaon.

Isa ka adlaw sang bag-o palang sia makasugod obra sa pabrika, nakasumalang si Arlene sang isa ka estilo sang tahi nga nagpabudlay sa iya. Nagapungko sia sa iya makina nga nagapanastas sang iya gintahi. Daw wala gid sing may makabulig sa iya, kay ang iban nga mga sastre nagahingagaw man nga makatapos sang mas madamo. Daw maampo na gid si Arlene. Mahipos sia nga naghibi.

Sa tabok ni Arlene nagapungko si Bernice Rock. Mas magulang sia kag mas may eksperiensya bilang sastre. Sang makita ang kabudlayan ni Arlene, ginbiyan ni Bernice ang iya gi-naobra kag nagtupad kay Arlene, nga malulo nga nagtudlo kag nagbulig. Gin-updan niya si Arlene tubtob nga nakuha niya ang estilo kag nahuman ang iya ginatahi. Nagbalik si Bernice sa iya makina, nga nawad-an sang oportunidad nga makahuman sang mas madamo nga talahion, kon wala sia kuntani magbulig.

Sa sining isa ka buhat sang mapi-nalanggaon nga kaayo, nangin suod nga mag-abyan sa ila bug-os nga kabuhi kanday Bernice kag Arlene. Ang kada isa nagpamana kag nakan-angkon sang mga anak sang ulihi. Sang mga 1950, si Bernice, nga isa ka miyembro sang Simbahan, nag-hatag kay Arlene kag sa iya pamilya sang kopya sang Libro ni Mormon. Sang 1960, si Arlene kag ang iya bana kag kabataan ginbunyagan nga mga miyembro sang Simbahan. Sang ulihi ginhugpong sila sa balaan nga templo sang Dios.

Bilang resulta sang kaluoy nga ginpakita ni Bernice sang ginbuligan niya ang isa nga indi niya kilala nga ginabudlayan kag nagakinahang-lan sing bulig, indi maisip nga mga indibidwal, alangay nagakabuhi kag minatay, sa karon nagaambit sa naga-pangluwas nga mga ordinansa sang ebanghelyo.

Kada adlaw sa aton kabuhi ginahatagan kita sang mga oportunidad nga magpakita sang gugma kag kaayo sa mga tawo nga ara sa aton palibot. Siling ni Pangulong Spencer W. Kimball: "Kinahanglan naton panumdu-mon nga ang mga tawo nga masugata naton sa mga parkingan, mga opisina, mga elevator, kag sa bisan diin amo ang bahin sang katawhan nga gin-hatag sa aton sang Dios agud pa-langgaon kag alagaran. Mangin wala sang kapuslanan kon maghambal kita parte sa kabilugan nga pag-ulolutod sang katawhan kon indi naton maka-big ang yara sa aton palibot nga aton mga kauturan."⁶

Sa masami ang mga oportunidad nga mapakita naton ang aton gugma nagaabot lang gulpi. Isa ka halimbawa sang amo nga oportunidad mabasahan sa isa ka peryodiko sang Oktubre 1981. Nakadayaw gid ako sa gugma kag kaluoy nga ginsaysay didto sa bagay nga gintago ko gid ining artikulo sa akon mga rekord sang masobra 30 ka tuig.

Ang artikulo nagsulat nga ang diretsa nga biyahe sang Alaska Airlines halin sa Anchorage, Alaska pakadto sa Seattle, Washington—nga nagalulan sang 150 ka pasahero—ginpalikaw sa maligwin nga banwa sa Alaska agud sugaton ang isa ka bata nga malubha nga napilasan. Nautod ang ugat sa butkon sang duha-ka-tuig nga bata nga lalaki sang matumba sia sa buka nga kristal samtang naga-hampang malapit sa ila balay. Ang banwa may 450 ka milya (725 km) nabagatnan sang Anchorage kag wala gid sa alagyan sang eroplano. Pero, ang mga medics sa natabuan despe-rado nga nagpangabay sang bulig, kag gani ang biyahe sang eroplano

ginlikaw agud kuhaon ang bata kag dalhon sa Seattle agud mabulong sa isa ka ospital.

Sang maghugpa ang eroplano malapit sa naligwin nga banwa, ginham-balang sang mga medics ang piloto nga grabe gid ang pagdugo sang bata nga indi niya masarangan ang biyahe pa-Seattle. Gindesiyonan nga mag-biyahe pa gid sang 200 ka milya (320 km) sa lain pa gid nga rota padulong sa Juneau, Alaska, ang pinakamalapit nga siyudad nga may ospital.

Matapos madul-on ang bata sa Juneau, ang eroplano nagpadulong na sa Seattle, nga tama na ka ulihi sa natalana nga oras. Wala gid sang pasahero nga nagreklemo, bisan pa nga kalabanan sa ila maulihi na sa ila mga kaladtuwan kag sa nagaunod nga mga biyahe. Sa matuod, samtang nagalakat ang oras, nag-amot-amot sila, kag nakatipon sang dako-dako gawa nga kantidad para sa bata kag sa iya pamilya.

Sang manughugpa na ang eroplano sa Seattle, naghinugyaw ang mga pasahero sang gin-anunsyo sang piloto nga ginraduuhan sia nga naka-lampuwas na sa peligro ang bata.⁷

Nagsulod sa akon hunahuna ang mga pulong sa balaan nga kasulatan: "Ang putli nga pagmahal amo ang putli nga gugma ni Cristo, . . . kag kon sin-o man ang makita nga nagaang-kon sini sa katapusan nga adlaw, mangin maayo ini sa iya."⁸

Mga kauturan, ang pila sang aton pinakadako nga oportunidad nga magpakita sang aton gugma yara mismo sa sulod sang aton mga puluy-an. Ang gugma dapat nga mangin sentro sang kabuhi sa panimalay, pero kon kaisa wala ini nagkatabo. Mahimo nga pirme nalang may pag-inugtas, madamo nga pagbinaisay, masami nga pag-ilinaway, madamo nga luha. Masubo nga napamangkot ni Pangulong Gordon B. Hinckley: "Ngaa bala nga [yadtong] ginapalangga [gid] naton amo ang pirme ginapunteryia sang aton masakit nga mga tinaga? Ngaa bala nga kon kaisa nagahambal

[kita] nga daw may mga punyal nga nagapangpilas?”⁹ Ang mga sabat sa sining mga pamangkot mahimo nga nagakalain-lain para sa kada isa sa aton, pero ang punto amo nga wala sing kabilangan kon ano man ang reason. Kon sundon naton ang kasuguan nga magpalanggaanay sa isa kag isa, kinahanglan naton kabigon ang kada isa nga may kalulo kag respeto.

Siyempre may mga tion nga kinahanglan magpatuman sang disiplina. Pero, panumdumon gid naton, ang laygay nga makita sa Doctrine and Covenants—nga nagasiling, nga kon kinahanglan gid naton magsaway sa kada isa, dapat kita magpakita sang mas dako nga pagpalangga pagkatapos sini.¹⁰

Kabay nga magtinguha gid kita pirme nga magpasunaid kag mangin sensitibo sa mga panghunahuna kag mga balatyagon kag mga sirkumstan-sya sadtong yara sa aton palibot. Indi kita magpakanubo ukon magpanghi-kay. Kundi, magmangin maluluy-on kita kag magpaisog. Kinahanglan naton maghalong nga indi naton maguba ang kompiyansa sang isa ka tawo paagi sa paras nga mga tinaga ukon buhat.

Ang pagpatawad dapat magkaupod sa pagpalangga. Sa aton mga pamilya, subong man sa aton kaab-yanan, mahimo nga may mga nasakit nga balatyagon kag di-paghampayan. Sa liwat, wala kabilangan kon daw ano kadako ang ginsuguran. Indi puede kag indi dapat nga pabay-an ini nga mag-ut-ot, maglala, kag sa ulhi magpangguba. Ang pagbasol nagapabilin sang mga pilas nga bukas. Ang pagpatawad lamang ang nagapaayo.

Isa ka matahum nga babayi nga madugay na nga nagtaliwan ang nagbisita sa akon isa ka adlaw kag sa wala ginapaabot nagpautwas sang pila ka mga pagkanugon. Ginsugid niya ang isa ka hitabo nga madugay na kaayo parte sa isa ka kaingod

nga mangunguma, nga sadto isa ka suod nga abyán pero nakigbaisay sa iya kag sa iya bana sing may pila man ka beses. Isa ka adlaw ining mangunguma nag-ayo kon puede sia manglaktod sa iya duta padulong sa iya uma. Sa sini nga punto nagdulog sia sa pag-istorya sa akon kag, upod ang pagkurog sa iya tingug, nagsiling, “Brother Monson, wala ko sia ginpaagi sa amon duta sang amo to nga tion ukon bisan san-o kundi ginpalibot ko gid sia nga nagalakat padulong sa iya propyedad. Nakasala ako, kag ginahinulsolan ko ato. Wala na sia subong, pero abaw, kuntani mahambal ko sa iya, ‘Patawara ako.’ Handom ko gid tani nga may isa pa ako ka kahigayunan nga mangin maayo.”

Samtang nagapamatíko sa iya, nagsulod sa akon hunahuna ang masubo nga obserbasyon ni John Greenleaf Whittier: “Sa tanan nga masubo ihambil ukon isulat, ang pinakamasubo amo ini: ‘Kuntani!’”¹¹ Mga kauturan, kon trataron naton ang iban nga may gugma kag pagpasu-naid, malikawan naton ang kasubong nga mga pagbasol.

Ang gugma mapahayag sa madamo nga paagi nga dali matalupang-dan: isa ka yuhum, isa ka pagkaway sang kamot, isa ka manami nga pag-muno, isa ka pagdayaw. Ang iban nga mga pagpahayag mahimo nga indi athagon, pareho sang pagpakita sang interes sa ginabuhat sang iban, pag-tudlo sang isa ka prinsipyó nga may kalulo kag pagpasensya, pagbisita sang nagamasakit ukon nahunong sa balay. Ining mga pulong kag mga buhat kag madamo nga iban pa sarang magpaalinton sang pagpalangga.

Si Dale Carnegie, isa ka kilala nga Amerikano nga manunulat kag manunudlo, nagbati nga ang tagsa ka tawo may yara sa sulod niya sang “gahum nga padakuon ang sumada sang kalipayan [sang] kalibutan paagi sa pagmitlang sang pila ka tinaga

sang sinsero nga pagpasalamat sa isa nga nagaisahanon ukon napaslawan.” Siling niya, “Ayhan malimtan mo na bwas ang malulo nga mga pulong nga ginsambit mo karon, pero tipigan ini sang ginhambalan mo sa bug-os niya nga kabuhi.”¹²

Kabay nga magsugod kita subong, sini mismo nga adlaw, nga magpahayag sang gugma sa tanan nga mga anak sang Dios, bisan pa sa mga miyembro sang aton pamilya, sa aton mga abyán, mga kakilala, ukon sa mga estranghero. Sa aton pagbugtaw sa tagsa ka aga, dapat magdesisyón kita nga aksyunan nga may pagpalangga kag kaayo ang bisan ano nga magaabot sa aton.

Indi naton matungkad, mga kauturan ko, ang gugma sang Dios para sa aton. Bangod sining gugma, ginpadala Niya ang Iya Anak, nga nagpalangga sa aton sing tuman agud ihatag ang Iya kabuhi para sa aton, agud maangkon naton ang wala'y katapusan nga kabuhi. Kon mahangpan naton ining indi matungkad nga dulot, ang aton mga tagipusuon mapuno sang gugma para sa aton Wala'y Katapusan nga Amay, para sa aton Manluluwas, kag para sa tanan nga katawhan. Hanuot ko nga gina-pangamuyo nga mangin subong sini sa sagrado nga ngalan ni Jesucristo, amen.

MGA TANDA

1. Mateo 22:36–39.
2. Marcus 12:31.
3. 1 Juan 4:21
4. Lucas 23:34.
5. Indi kilala nga tagsulat, sa Richard L. Evans, “The Quality of Kindness,” *Improvement Era*, Mayo 1960, 340.
6. *The Teachings of Spencer W. Kimball*, ed. Edward L. Kimball (1982), 483.
7. Tan-awa sa “Injured Boy Flown to Safety,” *Daily Sitka Sentinel* (Alaska), Okt. 22, 1981.
8. Moroni 7:47.
9. Gordon B. Hinckley, “Let Love Be the Lodes-tar of Your Life,” *Ensign*, Mayo 1989, 67.
10. Tan-awa sa Doctrine and Covenants 121:43.
11. “Maud Muller,” sa *The Complete Poetical Works of John Greenleaf Whittier* (1878), 206; pagdagmit gindugang.
12. Dale Carnegie, sa, halimbawa, Larry Chang, *Wisdom for the Soul* (2006), 54.

Mga Pinanudlo para sa Aton Panahon

Halin sa Mayo 2014 tubtob Oktubre 2014, ang mga leksyon sa Melchizedek Priesthood kag sa Relief Society sa ikap-at nga mga Domingo dapat maghalin sa isa ukon mas madamo pa nga mga pamulong-pulong nga ginhatac sa pang-kabilugan nga komperensya sang Abril 2014. Sa Oktobre 2014, ang mga pamulong-pulong mahimo nga kuhaon gikan sa Abril 2014 ukon sa Oktobre 2014 nga pang-kabilugan nga komperensya. Ang mga stake kag district president dapat magpili kon ano nga mga pamulong-pulong ang pagagamiton sa ila mga lugar, ukon mahimo nila itulin ini nga responsibilidad sa mga bishop kag branch president.

Ang mga pamulong-pulong sarang mabasa sa madamo nga mga lengguahen sa conference.lds.org.



Ni Pangulong Henry B. Eyring
Unang Manuglaygay sa Unang Panguluhan

Isa ka Bilidhon nga Palanublion sang Paglaum

Sa pagpili ninyo kon maghimo ukon magtipig sang kasugtanan upod sa Dios, nagapili kamo kon bala magabilin kamo sang palanublion sang paglaum sa ila nga mahimo magsunod sang inyo halimbawa.

Pinalangga kong mga kauturan, ang pila sa inyo gin-agda sa sini nga miting sang mga misyonero sang Ang Simbahan ni Jesucristo sang mga Santos sa Ulihing mga Adlaw. Inang mga misyonero mahimo nga nag-agda na sa inyo nga maghimo sang desisyon nga makigsugot sa Dios paagi sa pagpabunyag.

Ang iban sa inyo nagapamati tungod ginbaton ninyo ang imbitasyon sang isa ka ginikanan, asawa, ukon ayhan sang bata, nga gintanyag sa inyo sa paglaum nga pilion ninyo nga ibalik sa sentro sang inyo mga kabuhi ang mga kasugtanan nga ginhimo ninyo upod sa Dios. Ang iban sa inyo nga nagapamati nakadesisyon na nga magbalik sa pagsunod sa Manluluwas kag nagabatyag subong sang kalipay sang Iya pag-abiabi.

Kon sin-o man kamo kag bisan sa diin man kamo, ginakaptan ninyo sa inyo mga kamot ang kalipayan sang mas madamo pa nga mga tawo sangsa inyo mahunahuna. Kada adlaw kag kada oras sarang kamo magpili nga maghimo ukon magtipig sang isa ka kasugtanan upod sa Dios.

Kon sa diin man kamo nga punto sa alagyan sa pagpanubli sang dulot sang wala'y katapusan nga kabuhi, may oportunidad kamo nga ipakita sa madamo nga tawo ang dalan padulong sa mas dako nga kalipayan. Sa pagpili ninyo kon maghimo ukon magtipig sang kasugtanan upod sa Dios, nagapili kamo kon bala magabilin kamo sang palanublion sang paglaum sa ila nga mahimo magsunod sang inyo halimbawa.

Kamo kag ako ginbugayan sang pangako sang amo nga palanublion. Utang ko ang akon kalipay sa kabuhi sa isa ka tawo nga wala ko gid makilala sa sining kinabuhi. Isa sia ka ilo nga nanginisa sa akon mga lolo sa tuhod. Ginbilinan niya ako sang isa ka bilidhon nga palanublion sang paglaum. Sugiran ko kamo sang papel nga iya gintungdan sa pagtuga sinang palanublion para sa akon.

Ang iya ngalan amo si Heinrich Eyring. Nabun-ag sia sa manggaranon nga pamilya. Ang iya amay, nga si Edward, may dako nga propyedad sa Coburg, nga yara sa ginatawag subong nga Germany. Ang iya iloy amo ang sadto Viscountess Charlotte Von Blomberg. Ang iya amay amo ang manugdumala sang mga kadutuan sang hari sang Prussia.

Si Heinrich amo ang subang nga bata nanday Charlotte kag Edward. Si Charlotte napatay sa idad nga 31, matapos ibun-ag ang iya ikatatlo nga bata. Wala madugayi napatay man si Edward, nga nawad-an sang tanan niya nga propyedad kag manggad sa isa ka nalugaw-an nga negosyo. Nagaidad pa lamang sia sang 40 ka tuig. Ginbilin niya nga ilo ang tatlo ka kabataan.

Si Heinrich, ang akon lolo sa tuhod, nawad-an sang iya mga ginikanan kag sang dako kaayo nga dutan-on nga manggad. Wala gid sia sang kwarta. Ginsulat niya sa iya journal nga pamatyag niya ang iya maayong kapalaran magaabot kon magkadto sia sa Amerika. Bisan pa nga wala sia sang pamilya ukon mga abyansido, nakabatyag sia sang paglaum kon magkadto sia sa Amerika. Sang

primero nagkadto sia sa siyudad sang New York. Sang ulihi nagsaylo sia sa St. Louis, Missouri.

Sa St. Louis isa sang iya kaupod sa trabaho isa ka Santos sa Ulihing mga Adlaw. Ginhatagan sia sini sang isa ka kopya sang balasahon [pamphlet] nga ginsulat ni Elder Parley P. Pratt. Ginbasa niya ini kag dayon gintun-an ang tagsa ka balasahon nga iya makita parte sa mga Santos sa Ulihing mga Adlaw. Nagpangamuyo sia agud mahibal-an kon matuod nga may mga anghel nga nagpakita sa mga tawo, kon may buhi nga propeta, kag kon nasalapuan na niya ang matuod kag ginpahayag (sang Dios) nga relihiyon.

Pagkatapos sang duha ka bulan sang matutom nga pagtuon kag pagpangamuyo, si Heinrich nag-damgo kon sa diin ginhambalan sia nga magpabunyag. Ang tawo nga ang iya ngalan kag priesthood akon gid ginatahad, nga si Elder William Brown, amo ang magahikot sang ordinansa. Si Heinrich ginbunyagan sa isa ka punong sang tubig-ulan sang Marso 11, 1855, sang 7:30 sa aga.

Nagapati ako nga si Heinrich Eyring nakahibalo sadto nga ang akon ginatudlo sa inyo karon matuod. Nakahibalo sia nga ang kalipay sang wala'y katapusan nga kabuhi nagaabot paagi sa mga kaangtanan sang pamilya nga nagapadayon sa katubtuban. Bisan pa nga bag-o niya pa lang masalapuan ang plano sang kalipayan sang Ginuo, nahibal-an niya nga ang iya paglaum para sa wala'y katapusan nga kalipay nasandig sa hilway nga mga pagpili sang iban nga sundon ang iya halimbawa. Ang iya paglaum sa wala'y katapusan nga kalipayan nasandig sa mga tawo nga wala pa mabun-ag.

Bilang bahin sang palanublion sang paglaum sang amon pamilya, nagbilin sia sang journal para sa iya mga kaanakan.

Sa sina nga journal nabatyagan ko ang iya pagpalangga sa amon nga magasunod sa iya. Sa iya mga pulong nabatyagan ko ang iya paglaum nga ang iya mga himata mahimo magpili

nga sundon sia sa dalan pabalik sa aton langitnon nga puluy-an. Nahibulan niya nga indi ini mangin resulta sang isa ka dako nga pagpili kundi sang madamo nga magagmay nga mga pagpili. Sambiton ko gikan sa iya journal:

"Halin sang una ko palang mabatian si Elder Andrus nga nagham-bal . . . nagatambong gid ako sa mga miting sang mga Santos sa Ulihing mga Adlaw kag malaka lang gid nga indi ako makatambong, tungod na-nigin obligasyon ko ang magtambong sining mga miting.

"Ginasulat ko ini sa akon journal agud ang akon kabataan mahimo magsunod sa akon halimbawa kag indi magsikway sining. . . importante nga katungdanan [nga magtipon] kaupod sa mga Santos."¹

Nakahibalo si Heinrich nga sa mga pang-sakramento nga miting sarang naton mabag-o ang aton pangako nga panumdumon pirme ang Man-luluwas kag mag-angkon sang Iya Espiritu nga mangin kaupod naton.

Ang amo nga Espiritu amo ang nagpabakod sa iya sa misyon nga gintanyag sa iya pila lamang ka bulan pagkatapos mabaton ang kasugtanan sa bonyag. Ginbilin niya bilang palanublion ang iya halimbawa sa pagpadayon nga matutom sa iya misyon sa sulod sang anom ka tuig sa lugar nga ginatawag sadto nga Indian Territories. Agud mabaton ang iya release halin sa misyon, naglakat sia halin sa Oklahoma pakadto sa siyudad sang Salt Lake, nga ang kalyouon may halos 1,100 ka milya (1,770 km).

Wala madugayi gintawag sia sang propeta sang Dios nga magsaylo sa nabagatnan nga Utah. Didto nabaton niya sang isa naman ka tawag nga magmisyon sa iya natawhan nga Germany. Dayon ginbaton man niya ang pangagda sang isa ka Apostoles sang Ginoong Jesucristo nga magbulig pasad sang mga duog para sa mga Santos sa Ulihing mga Adlaw sa naaminhan nga Mexico. Sang didto na sia gintawag naman sia sa siyudad sang Mexico bilang isa ka full-time

nga misyonero. Gintuman niya ining mga calling. Ginlubong sia sa isa ka gamay nga sementeryo sa Colonia Juárez, Chihuahua, Mexico.

Ginasaysay ko ining mga butang indi agud ipadayaw sia ukon ang iya mga hinimuan ukon ang iya mga himata. Ginasaysay ko ining mga butang agud pasidungan sia sa halimbawa sang pagtuo kag paglaum nga yara sa iya tagipusuon.

Ginbaton niya ining mga tawag tungod sa iya pagtuo nga ang nabanhaw nga Cristo kag ang aton Amay nga Langitnon nagpakita kay Joseph Smith sa kakahuyan sa estado sang New York. Ginbaton niya ang mga ini tungod may pagtuo sia nga ang mga yabi sang priesthood sa Simbahang Ginuo ginpanumbalik upod ang gahum sa paghugpong sang mga pamilya sa katubtuban, kon lamang sila may nagakaigo nga pagtuo agud tipigan ang ila mga kasugtanan.

Pareho kay Heinrich Eyring, nga akon lolo, mahimo nga una man kamo sa inyo pamilya sa pag-usoy sa dalan padulong sa wala'y katapusan nga kabuhi sa banas sang sagrado nga mga kasugtanan nga ginhimo kag gintipigan nga may katutom kag pagtuo. Ang tagsa ka kasugtanan may kaupod nga mga katungdanan kag mga pangako. Para sa aton tanan, kasubong kay Heinrich, ining mga katungdanan kon kaisa simple lamang pero sa masami mabudlay. Pero panumduma, ang mga katungdanan dapat gid kon kaisa nga mabudlay bangod ang ila katuyuan amo nga itulod kita sa dalan agud magkabuhi upod sa Amay nga Langitnon kag sa Iya Hinigugma nga Anak, nga si Jesucristo, sa mga pamilya.

Madumduman ninyo ang mga pulong gikan sa libro ni Abraham:

Ginpakita sang Dios kay Abraham nga may isa nga nagtindog nga kaupod nila nga daw kaanggid sa Dios, kag nagsiling sia sa ila nga kaupod niya nga: Manaog sila kag magkuha sang mga materyales kag maghimo sang duta nga mahimo naton puy-an;

Kag pagatilawan nila kita agud tanawon kon himuong naton ang tanan nga mga butang nga isugo sa aton sang Ginoong Dios;

Kag kon aton tipigan ang aton nauna nga estado pagadugangan kita; kag kon indi naton matipigan ang aton nauna nga estado indi naton mabaton ang pareho nga himaya sadtong mga nagtipig sang ila nauna nga estado; kag kon tipigan naton ang aton ikaduha nga estado pagadugangan ang aton himaya sa wala'y katubtuban.²

Ang pagtipig sang aton ikaduha nga estado nagadepende sa aton paghimo sang mga kasugtanan upod sa Dios kag sa matutom nga paghimo sang mga katungdanan nga ginapanngayo sa aton. Kinahanglan naton sang pagtuo kay Jesucristo bilang aton Manluluwas agud matipigan ang sagrado nga mga kasugtanan sa bug-os naton nga kabuhi.

Bangod si Adan kag si Eba napukan, maagyan naton ang mga pagsulay, pagtilaw, kag kamatayon bilang aton pangkabilugan nga palanublion. Apang, ang aton mapinalanggaon nga Amay nga Langitnon naghatag sa aton sang dulot sang Iya Hinigugma nga Anak, nga si Jesucristo, bilang aton Manluluwas. Inang dako nga regalo kag bugay sang Pagpasag-uli ni Jesucristo nagadala sang pangkabilugan nga palanublion: ang pangako sang Pagkabanhaw kag ang posibilidad sang kabuhi nga wala'y katapusan sa tanan nga nabun-ag.

Ang pinakadako sa tanan nga mga bugay sang Dios, nga amo ang wala'y katapusan nga kabuhi, mabaton lamang naton kon maghimo kita sang mga kasugtanan nga ginatanyag sa matuod nga Simbahan ni Jesucristo paagi sa Iya awtorisado nga mga alagad. Tungod sang Pagkapukan, kita tanan nagakinahanglan sang nagapangtinlo nga epeko sang bonyag kag sang pagtakdong sang mga kamot agud batunon ang dulot sang Balaan nga Espiritu. Ining mga ordinansa dapat hikuton sadtong mga nagakapot sang husto nga awtoridad sang priesthood. Dayon, upod ang

bulig sang Kasanag ni Cristo kag sang Balaan nga Espiritu, sarang naton matipigan ang tanan nga mga kasugtanan nga ginhimo naton upod ang Dios, ilabi na gid ang mga gintanyag sa Iya balaan nga mga templo. Sa sina lamang nga paagi, kag upod sinang bulig, ang bisan sin-o sarang makaangkon sang iya kinamatarong sa palanublion bilang anak sang Dios sa isa ka pamilya sa katubtuban.

Sa pila nga nagapamati sa akon, ayhan daw halos isa na lamang ina ka wala'y katumanan nga damgo.

Nakita ninyo ang matinuhon nga mga ginikanan nga nagakasubo para sa ila kabataan nga nagsikway ukon nagpili nga supakon ang ila mga kasugtanan upod sa Dios. Pero ining mga ginikanan makasalapo sang kaumpawan kag paglaum gikan sa eksperiensya sang iban nga mga ginikanan.

Ang mga anak nga lalaki ni Alma kag ni Haring Mosias nagbalik gikan sa masupog nga pagrebelde batok sa mga kasugtanan kag sa mga kasuguan sang Dios. Nakita sang Bata nga Alma ang iya anak nga si Corianton nga nagliso gikan sa sobra nga pagpaketala pabalik sa matinuhon nga pag-alagad. Ang Libro ni Mormon nagaerekord man sang milagro sang mga Lamanhon nga nagbiya sang mga tradisyon nga kaugtan ang pagkamatatarong padulong sa pagpakigsugot nga manginmatay agud mapadayon ang paghidaet.

Isa ka anghel ang ginpadala sa bata nga Alma kag sa mga anak ni Mosias. Nagpakita ang anghel tungod sa pagtuo kag mga pangamuyo sang ila mga amay kag sang katawhan sang Dios. Sa sining mga halimbawa sang gahum sang Pagpasag-uli nga nagahikot sa mga tagipusuon sang tawo, sarang ninyo mabaton ang kaisog kag kaumpawan.

Ang Ginuo naghatag sa aton sang tanan nga ginhalinan sang paglaum samtang nagatinguha kita nga buligan ang aton mga mahal sa kabuhi nga batunon ang ila wala'y katapusan nga palanublion. Nakapangako Sia sa aton

samtang padayon kita nga nagatinguha agud tipunon ang mga tawo sa Iya, bisan pa nga ginapakigbatuan nila ang Iya pagpangagda sa ila. Ang ila pagpakigbato nagapasubo sa Iya, pero wala Sia nagapangampo, kag dapat kita amo man. Ginpahamtang Niya ang persekto nga halimbawa para sa aton upod ang Iya tayuyon nga paghigugma: "Kag sa liwat, daw ano kasanson nga buot ko kuntani kamo nga panipunon subong sang isa ka munga nga nagapanipon sang iya mga piso sa idalom sang iya pakpak, huo, O kamong katawhan sang panimalay sang Israel, nga nalaglag; huo, O kamong katawhan sang panimalay sang Israel, kamo nga nagpuyo sa Jerusalem, subong sa inyo nga nalaglag; huo, daw ano kasanson nga buot ko kuntani kamo nga panipunon subong sang isa ka munga nga nagapanipon sang iya mga piso, kag indi kamo buot."³

Sarang kita magsandig sa sinang wala'y pagpalya nga kaluyag sang Manluluwas nga dalhon ang tanan nga mga anak nga espiritu sang Amay nga Langitnon pabalik sa ila puluy-an kaupod Niya. Ang tagsa ka matinuhon nga ginikanan, lolo, kag kalolohan nagaupod sa sinang kaluyag. Ang Amay nga Langitnon kag ang Manluluwas amo ang aton persekto nga mga halimbawa kon ano ang aton masarangan kag dapat himuong. Wala nila kita ginapuwresa nga manginmatarong tungod ang pagkamatatarong dapat ginapili. Ginapakita Nila sa aton kon ano ang matarong, kag ginapakita Nila sa aton nga ang mga bunga sini manamit.

Ang tagsa ka tawo nga nabun-ag sa kalibutan nagabaton sang Kasanag ni Cristo, nga amo ang nagabulig sa aton nga makita kag mabatyagan kon ano ang husto kag kon ano ang sayop. Ang Dios nagpadala sang mortal nga mga alagad nga sarang magbulig sa aton, paagi sa Balaan nga Espiritu, nga makilala kon ano ang Iya buot ipahimo sa aton kag kon ano ang Iya ginadili. Ginahimo sang Dios nga makagalanyat ang magpili sang husto paagi sa pagpabatyag sa

aton sang mga epektong aton mga pagpili. Kon pilion naton ang husto, masalapuan naton ang kalipayan—sa husto nga tion. Kon pilion naton ang malain, magaabit ang kasubo kag paghinulsol—sa husto nga tion. Ining mga epektong pihong gid. Pero sa masami hungod ini nga ginapadugay-dugayan. Kon yara dayon ang mga bugay, ang pagpili sang husto indi magpatubo sang pagtuo. Kag tungod ang ksubo kon kaisa ginapadugayan man, nagakinahanglan sang pagtuo agud mabatyagan ang kakinahanglanon sa pagpangayo sang kapatawaran para sa sala sing mas temprano imbes nga pagkatapos na naton mabatyagan ang iya masubo kag masakit nga epektong.

Si Tatay Lehi nagpangasubo sa mga pagpili nga ginhimo sang pila niya ka kabataan kag sang ilang pamilya. Isa sia ka dunganon kag maayo nga tawo—isa ka propeta sang Dios. Masami sia nga nagapanaksihon parte sa Manluluwas, nga si Jesucristo, sa ilang. Isa sia ka halimbawa sang pagkamatinumanon kag pag-alagad sang gintawag sia sang Ginuo nga bayaan ang tanan niya nga kalibutanon nga manggad agud luwasong iya pamilya sa pagkalaglag. Sa katapusang mismo sang iya kabuhi, nagapanaksihon gihapon sia sa iya kabataan. Pareho sa Manluluwas—kag wala'y sapayan sang iya gahum nga mahibaluan ang ilang nabatyanan kag makita ang palaabuton alangay nga masubo kag manami—si Lehi padayon nga nagtan-ay sang iya mga kamot agud dalhon ang iya pamilya padulong sa kaluwasan.

Karon minilyon sa mga kaliwatan ni Tatay Lehi ang nagapakamarong sang iya paglaum para sa ilang.

Ano ang sarang naton himuon agud matun-an ang halimbawa ni Lehi? Sarang naton matun-an ang iya halimbawa paagi sa pagtuon sang balaan nga kasulatan sing mainampuon kag paagi sa pag-obserba.

Ginapanugyan ko nga binag-binagon ninyo ang malip-ot kag malawig nga resulta samtang ginatinghuuan ninyo nga ihatag ang

palanublion sang paglaum sa inyo pamilya. Sa malip-ot nga panahon, may mga kabudlayan kag magabakas si Satanas. Kag may mga butang nga dapat gid hulaton sing mapinasensyon, nga may pagtuo, nga nagasalig nga ang Ginuo nagagihoh sa Iya nga tinion kag sa Iya paagi.

May mga butang nga sarang ninyo himuon sing temprano, kon magagmay pa ang inyo mga pinalangga. Panumduma nga ang adlaw-adlaw nga pangamuyo sa pamilya, pagtuon sang balaan nga kasulatan sa panimalay, kag pagpaambit sang aton panaksihon sa pang-sakramento nga miting mas mahapos kag mas epektibo kon magagmay pa ang kabataan. Ang magagmay nga kabataan sa masami mas sensitibo sa Espiritu sangsa pagdumdom naton.

Kon magdalagko na sila, madumduhan nila ang mga himno nga ginkanta nila upod sa inyo. Mas labi pa gid sangsa pagdumdom sang musika, madumduhan nila ang mga pulong sa balaan nga kasulatan kag ang panaksihon. Ang Balaan nga Espiritu sarang magpabalik sang tanan nga mga butang sa ilang handurawan, pero ang mga tinaga sa balaan nga mga kasulatan kag sa mga himno ang magatiner gid sing madugay. Yadtong mga handurawan magaimpluwensya sa ilang magbalik kon mapalayo sila sing makadali, basi sing tinuig man, gikan sa dalan papuli sa kabuhi ng wala'y katapusang.

Kinahanglan naton ang mas malawig nga panglantaw kon yadtong mga palangga naton nagabatyag sang impluwensya sang kalibutan kag ang pagduhaduha daw nagakulap sa ilang pagtuo. May yara kita sang pagtuo, paglaum, kag putli nga gugma nga magagiya sa aton kag magpabakod sa ilang.

Nakita ko ina bilang manuglaygay sa duha ka buhi nga mga propeta sang Dios. Sila mga indibidwal nga may magkaturay nga mga kinaiya. Pero daw magkapareho ang ilang tayuyon nga pagkapositibo. Kon may isa nga magpabutay sang problema

parte sa Simbahon, ang ila masami nga sabat amo ang “Ah, malampusan naton ina.” Mas madamo pa gani sila sang nahibaluan parte sa problema sangsa mga tawo nga nagpahibalo sang problema.

Nahibaluan man nila ang paagi sang Ginuo, kag gani pirme gid sila nga nagasalig sa Iya ginharian. Nahibaluan nila nga Sia amo ang pangulo. Nga Sia makagagahum sa tanan kag Sia nagaunikid. Kon tugtan ninyo Sia nga mangin lider sang inyo pamilya, malampuasan gid ninyo ang tanan.

Ang pila sa mga himata ni Heinrich Eyring daw nagtalalang na. Pero madamo sa iya mga kaapohan ang nagakadto sa mga templo sang Dios sa 6:00 sang aga agud maghikot sang mga ordinansa para sa mga katigulangan nga wala nila makilala. Naggwa sila tungod sa palanublion sang paglaum nga iya ginbilin. Nagbilin sia sang isa ka palanublion nga ginabaton sang madamo sa iya mga kaanakan.

Pagkatapos sang tanan nga aton mahimo upod ang pagtuo, ang Ginuo magapakatarong sang aton mga handum para sa mas dalagko nga mga bugay para sa aton nga pamilya sangsa aton mahunahuna. Gusto Niya ang pinakamaayo para sa ilang kag para sa aton, bilang Iya mga anak.

Kita tanan mga anak sang buhi nga Dios. Si Jesus sang Nasaret amo ang Iya Hinigugma nga Anak kag amo ang aton nabanhaw nga Manluluwas. Iya ini Simbahon. Yari diri ang mga yabi sang priesthood, kag gani ang mga pamilya sarang mangin sa katubtuban. Amo ini ang aton bilidhon nga palanublion sang paglaum. Nagasaksi ako nga ini matuod sa ngalan sang Ginuong Jesucristo, amen.

MGA TANDA

1. Tan-awa sa mga handurawan ni Henry Eyring, 1896, typescript, Church History Library, 16–21.
2. Tan-awa sa Abraham 3:24–26.
3. 3 Nephi 10:5.